

Peqqinnissaqarfimmik oqartussaaffiup Naalagaaffimmut uterteqqissinnaanera pillugu Naalakkersuisut UKA2021-mut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut. Nalunaarusiami qulaajarneqassapput oqartussaaffiup Naalagaaffimmut utertinneqarnerani qanoq aningaasatigut, sulisoqarnikkut kiffartuussinikkut, nunatsinnut aamma peqqissartunut kinguneqassanersoq
(Atassutip Inatsisartunut ilaasortaaitai)

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerreqarneranut

ISUMALIUTISSIISUTAA

Ataatsimiititaliap suliarinninnermini uku ilaasortarai:

Inatsisartunut ilaasortaq Malene Vahl Rasmussen, Demokraatit, siulittaasoq
Inatsisartunut ilaasortaq Mikivsuk Thomassen, Inuit Ataqtigiit, siulittaasup tullia
Inatsisartunut ilaasortaq Bo Martinsen, Demokraatit
Inatsisartunut ilaasortaq Anders Olsen, Siumut
Inatsisartunut ilaasortaq Nikkulaat Jeremiassen, Siumut
Inatsisartunut ilaasortaq Bo Martinsen, Demokraatit
Inatsisartunut ilaasortaq Stine Egede, Inuit Ataqtigiit
Inatsisartunut ilaasortaq Mariane Paviassen, Inuit Ataqtigiit

UKA2020-imi oktoberip 27.-iani siullermeerinninnerup kingorna siunnersuut ataatsimiititaliap misissorpaa.

1. Siunnersuutip imarisaa siunertaalu

Aalajangiiffigisassatut siunnersuutip akuerineqarneratigut, akisussaaffiup Naalagaaffimmut utertinneqarneratigut aningaasatigut, sulisoqarnikkut, sullissinernut, nunatsinnut napparsimasunullu qanoq kinguneqassanersoq pillugu nalunaarusiamik suliaqarnissamik Naalakkersuisut peqquneqarput.

2. Siunnersuutip Inatsisartunit siullermeerneqarnera

Siullermeerinermi peqqinnissaqarfimmi sulisoqarnq/sulisussarsiortarneq, sullissineq aningaasaqarnerlu pillugit oqallittoqangaatsiarpoq. Naak partiinit tamanit immikkoortup

itigartitsissutigineqarnissaa inassutigineqaraluartoq immikkoortoq ataatsimiititaliami suliarineqartussanngorlugu innersuussutigineqarpoq.

3. Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasatigut allaffissornikkullu kingunerisassai siunnersuummut tunngavilersuutitut allanneqassasut.

Siunnersuutip piviusunngortinneqarnissaanut aningaasatigut kingunerisassatut taaneqartut siunnersuummut naapertuuttut ataatsimiititaliap maluginiarpaa, taamaalilluni AC fuldmægtigimut ukiumut akissarsiaritinneqartut 500.000 kr.-t nalinginik immikkoortitsisoqassalluni.

4. Ataatsimiititaliap siunnersuummik suliarinninnera

Siunnersuut innuttaasunut pingaarutilimmik attuisoq aallarniutigalugu ataatsimiititaliamit maluginiarneqarpoq. Peqqinnissaqarfiup sullississutai il.il. pillugit Inatsisartut peqqussutaat nr. 15, 6. november 1997-imeersoq naapertorlugu, peqqinnissaqarfiup suliassaraa:

”§ 1. Peqqinnissaqarfiup suliassaasa pingaarnersaraat innuttaasut peqqissusiisa siuarsarnissaat, nappaatit nappaatinullu assingusut pinaveersaartinnissaat kiisalu inuit nappaatillit nappaatinullu assingusunik nappaatillit misissornissaat, katsorsarnissaat paarinissaallu.”

Innuttaasut peqqissusaat akisussaaffiusoq, aningaasanut, sulisunut, sullissinernut inunnullu napparsimasunut taamaallaat tunngassuteqanngitsoq tamatumunnga atatillugu ataatsimiititaliamit oqaatigineqassaaq. Peqqinnissaqarfiup suliassai assigiinngitsorpassuupput. Ataatsimiititaliap paasinninnera naapertorlugu akisussaaffiup matuma isumaginissaani **peqqissutsip siuarsarneqarnissaa, nappaatinik pinaveersaartitsineq, nappaatit ujartorneqarnissaat killilersimaarneqarnissaallu, nappaatinnguunnaveersaartitsineq, nappaateqalereersimanermi nappaatip ineriartunnginnissaa ajorsiertunnginnissaalu/annertusiartunnginnissaa** pineqarput.

Ataatsimiititaliap siunnersuummik nalilersuinermini nassuiaammi ima allassimasoqarnissaa naatsorsuutigineqarpoq:

- a) Peqqinnissaqarfik Naalagaaffimmut utertinneqassagaluarpat allannguutit sullissinermi, peqqinnissamut isumaginninnermi katsorsaannermilu suut allannguutigissavai
- b) Nuna tamakkerlugu suut allannguutaassappat
- c) Sulisoqarnermi suut allannguutaassappat
- d) Nunap aningaasaqarneranut suut allannguutaassappat

- e) Akisussaaffiup uterteqqinneqarnissaanut Naalagaaffik suleqataarusunnersoq misissorneqassaaq
- f) Nalunaarusiami ataatsimut inernilunneqartut akisussaaffiup uterteqqinneqarnerani kingunerisanut takussutissatut atorneqassaaq

Akisussaaffik Naalagaaffimmut uterteqqinneqassanersoq isummernissamut nalunaarusiaq tunngaviliisuussasoq ataatsimiititaliamit paasineqarpoq. Immikkoortup inersuarmi oqaluuserineqarnerani taama pisoqarnissaa naalakkersuinikkut **tapersersorneqanngitsoq** ataatsimiititaliaq aamma naliliivoq. Akisussaaffiup 1992-imi angerlaanneqarnerata kingorna nutarterisoqarpoq, taamaalilluni ullumikkut peqqinnissaqarfik nunap immikkoortuinut agguarneqarsimavoq nunalu tamakkerlugu napparsimmavik Nuummi inissisimalluni. Pisariaqartitsinerit naapertorlugit naleqqussartuatakkamik aningaasatigullu sinaakutissat naapertorlugit sullissineq pillugu allakkiaqarpoq. Naak nunap pissusaa pissutigalugu angallannikkut/attaveqatigiinnikku unammilligassaqaraluartoq innuttaasunit oqarasuaatikkut aamma/imaluunniit peqqinnissaqarfimmut nammineerluni takkulluni attaveqartoqarsinnaavoq. 1992-p kingorna peqqinnissamut tunngasunik ilinniartitaanernik arlalinnik Kalaallit Nunaanni pisariaqartitsineq aallaavigalugu inerisarneqarsimasunik pilersitsisoqarsimavoq.

Matumunnga aamma atatillugu Peqqinnissaq Pillugu Ataatsimiititaliarsuup suliakkiissutaa ataatsimiititaliap innersuussutigaa¹. suliakkiissut naapertorlugu peqqinnissaqarfiup iluani aningaasaqarnikkut isummersuutit tamakkiisumik ilaatinneqarnissaat Peqqinnissaq Pillugu Ataatsimiititaliarsuup qulakkiissavaa. Suliariumannittussarsiuussineq, pisariaqartitsineq, aaqqissuussaaneq aammalu peqqinnissaqarfimmi suliniutit assigiinngitsut kingunerisaannik tunngavigalugit peqqinnissaqarfiup aningaasaqarnera ingerlanneqarpoq. Pilersaarutaareersumik peqqinnissaqarfiup aningaasaqarnera pillugu misissuinerit isumaliutersuutillu peqqinnissaqarfiup kalaallit isaanni qanoq ingerlanneqarnissaanik aalajangiinissamut tunngavissatut qulakkeerisussat ingerlanneqareersut ataatsimiititaliaq isumaqarpoq.

Peqqinnissaqarfiup sullissineranik, sulisoqarniarneranik aningaasaqarneranillu naammagittaalliuteqarnermik siunnersuut aallaaveqartoq ataatsimiititaliap maluginiarpa. Peqqinnissaqarfiup ineriartornissamut periarfissaasa sammineqarnissaat pingaaruteqartorujussuusoq ataatsimiititaliamit isumaqatigineqarpoq, sapinngisamillu pitsaanerpaamik sullissineri angusaqarnissamut sinaakkusiornermi qulakkeerininniarnemi peqataajumalluni.

5. Ataatsimiititaliap inassuteqaatai

- Ataatsimiititaliap isumaqatigiittup siunnersuut itigartinneqassasoq inassutigaa

¹ https://naalakkersuisut.gl/da/Naalakkersuisut/Nyheder/2020/02/2802_sundhedskommission

6. Ataatsimiititaliap Naalakkersuisunut kaammattuutai

Ataatsimiititaliap isumaqatigiittup Naalakkersuisut kaammattorpai:

- Peqqinnissaqarfimmut saaffiginninnermi tigussaasumik suliniuteqartoqarnissaa, matumani ilanngullugu innuttaasut/napparsimasut piffinnilu peqqinnissaqarfiit akornanni attaveqatigiinnerup pitsanngorsarneqarnissaa
- Isorliunerusuni innuttaasut/ napparsimasullu sulisunik piffinni peqqinnissaqarfimmut imaluunniit nunap immikkoortuini napparsimavimmut qaninnerpaamut saaffiginninnissamut ataavartumik periarfissaqartuarnissaat, peqqinnissaqarfimmilu sulisut innuttaasunut saaffigiuminartumik pisariaqartitaallu aallaavigalugit suliaqartoqarnissaa eqqumaffigineqarnerulernissaa
- Nappaammut ersiutaasinnaasunut innuttaasut/napparsimasut saaffiginnittut sapinngisamik piaartumik misissorneqartarnissaannut pitsanngorsaasoqassasoq

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.



Malene Vahl Ramussen
Siulittaasoq




Mikivuk Thomassen
Siulittaasup tullia



Anders Olsen



Nikkulaat Jeremiassen



Stine Egede



Mariane Paviaasen